

1 JOON

Wargahng Umodho Naa Agweed Joone

Rob Ke Nying Warga

Warga gihr Joon naa agweede umodho, ngo agweed kaa nying nyepinye ariow me teeg. Mar umodho beehda ne ciihm cwihny yaa kwaan ngo beere ge ubeehdo yi wad ke Juog kedea Waahde Jeacuu Kriihjto. Riown gen beehda ne toohn yaa kwaan warga gihn ni ubahng puohny gihr yaa ucahb be lihng gene. Puohny gihn nu wad ke Juog raanye raanyo. Puohny gihn nu aniing ngo kejea giih reje yug rog gen ke nying beehdo upiny kan nyoadh ngo kejea Jeacuu Waahd Juog be rom nahg dhaano utaahngo. Yaa ucahb giih nu ngo atahr gene kejea boadh wahy yoad kii beehdo e dhaano be dier ke nying kuowo upiny gihn ni. Ge arubo kejea boadh wahy be naa yi nud cwihny kedea nhaahro maa wad.

Ne duog wiih lubo gihn ni, e Joon agweehdo urube ne dahr kejea Jeacuu Kriihjto anahg dhaano utaahngo ke ngude, kedea ubare maalo ke rob kejea dhiil gene rog gen ke nhyaro naa acielo acielo.

Kaa Acaan Luube

Lum umodho 1:1-4

Daahr kedea muudho 1:5-2:29

Nyethen Juog kedea nyethen atiihb ukeehg 3:1-24

Adiehr kedea gihn me raaj 4:1-6

Jo yiiho dhiil gene rog gen ke nhyaro 4:7-21

Teeg yiiho 5:1-21

Nгаа Yihre Ne Kuowo Me Ne Cohg

1 ¹ A gweehdo yihru kaa nying ngaa beehda Ciig Juog naa acub Juoge yihr nyoge. Ngaan nu e ne cub kuowo me ne cohg yihr nyoge. Ngo ngaa maa anudo umodho e piny poohd kuu acag. Abea wa jo aohr ngo aniid wane uboar wane ngo. Duone alihng wane e ngo urubo kedea giihe anaa atiihye ge aniid wane uboar wane en. Ngo amaahdh wane ke cing wan. ² Ngaa cub kuowo me ne cohg ameehg Juoge doohng ne dhaano beere ngo niid nyoge niido. E naa kaa aniid wane ngo noono. Gihn teed wane yihru beehda gihn maa atiihy ree kedea uniid wane ngo. E naa gihn koohb wane yihru kejea ngaa cub kuowo me ne cohg ngo anudo tiehd coon ke Juog Wuur. Abea ngo abeehn Juoge ne nyoadh yihr wan. ³ Awaahn ni wa rubo yihru kaa nying ngaan aniid wane kedea ulihng wane duone. Wa rubo yihru ke nyinge beere giih anaa arobe naa ayiih wane ge yiihu yiiho thiw beere wu unweehd naa acielo keehd wan. Kaano arumo e wo unweehd ke Juog Wuur kedea Waahde Jeacuu Kriihjto. ⁴ E naa gihn gweehda yihru ke nying giih me nweehd wun ke wan, beere med cwihny me duohng yoado yoado.

Nweehd Naa Acielo Ke Juog

⁵ Awaahn ni, Ciig gihn alihng wane bang Waahd Juog, ge daahd wane ke kahl yihru e gen: Juog beehda daahr. Kedea tiihj yi muudho tooro yihre. ⁶ Nea wo tiihy giih yi muudho abea wo ukoohbo kejea wo anweehd ke Juog e wo beehda yaa toohd, maa akweer ke tiihj ke giih beeye ge anyoadh Juoge. ⁷ Abea nea wo beed yi daahr gihr beey Juog wa kaano nahg Juoge abiohgrwaal ke dhe yoohn beeye nu, e nyoadh ngo kejea wo anweehd ne cohg, kedea e rem Jeacuu Kriihjto Waahde naa awoj piny ke nyingo adhemuohme giiho ge luoge ke oogo udoohngo ne nyoge me beeye yihr Juog.

Jeacuu E Ne Wuuny Adhemuohme Oogo

⁸ Nea wo ukoohbo kejea adhemuohme be yugo, e rogo akango kedea adiehj gihn anyoadh Juoge ngo kwihyo ne weey weey. ⁹ Abea nea ayiiho nyum Juog kejea adhemuohme ayugo, e Juog adhemuohme giiho ge wiie ke piny kedea ukahle ge oogo wudho. Ke dhog yiehdh nu wo beehne ke ne yugo ne nyoge me beeye yihre. Giih nu ge arob Juoge kejea ge utiihye kedea gihn arobe ngo tiihye tiihyo bang gihn Juog beehda abiohgrwaal. ¹⁰ Abea nea wo ukoohbo kejea adhemuohme maa akuongo ke yugo tooro, e Juog ke ngude e naa akoohbo toohd. Akoohbo toohd bang gihn akob Juoge kejea nyoge cang ge yaa adhemuohm. Kaano e naa ka bahng luub arob Juoge ge be yiiho naa adiehr.

2 ¹ Nyethena a gweehd yihru ke nying giih beere giih adhemuohm ge be tiihyu. Abea nea dhaano kiino adhemuohm ayuge, e adhemuohm gihre uwii Juoge piny yihre. Uwiie piny yihre bang gihn nud ke dhaano me cuung nyum Juog Wuur me rubo ke nyingo beere adhemuohme giiho ge wii Juoge ke piny. Beehda Jeacuu Kriihjto e ree tooro adhemuohm e naa ngaa rubo ke nyingo. ² Jeacuu athow beere ukihm gihr Juog pahdh wiie ke nying adhemuohme giiho. Kaano e Juog adhemuohme ge uwiie piny; padh adhemuohme giiho cog abea keehd adhemuohme giih nyoge me beed kuohn mooge wiih piny beehd.

Tiihj Ke Loohng Juog Kedea Nhyaar Rog

³ Gihn nyoadh ngo yihro ne cohg kejea wo nyoge me Juog ngahyo beehda tiihj gihn arob Juoge kea dhiilo ngo ke tiihyo. ⁴ Ngaa koohbo kejea Juog ngahye abea gihn akob Juoge be tiihye, e ngaan nu rob toohd kedea giih beey ge anyoadh Juoge ge kwihye. ⁵ Abea ngaa tiihy gihn arob Juoge, e ngaan nu Juog anhyaare ne cohg. Gihn nyoadh ngo

1:1 2:13-14; Jon 1:1-2, 14; Kuowo: 4:14; 6:35; 8:12; 11:25 1:2 Gihn teed wane: Jon 15:27 1:4 Jon 15:11 1:5-7 Jon 8:12

1:5 1Tim 6:16 1:6 2:4 1:7 3:5; Judea 9:12; Any 1:5 2:1 Rom 8:34; Judea 7:25 2:2 4:10; Jon 1:29

2:4 1:6; 4:6; Jon 3:21; 8:44; 16:13 2:5 2:17; 5:3; Jon 14:15; 2Jon 6

yihro ne cohg kejea wo anweehd keehd Juog, e man: ⁶ kwaad ngaan koohbo kejea e anweehd tiehd ke Juog kea dhiile beehdo ke dhe yoohn kaa abeehd Jeacuu kii ngo.

⁷ Jo'a maa anhyaara gihn gweehda yihru ke nyinge padh loohng me nyaahn me kuu akuong ke lihngo. Ngo beehda loohng me ngahyu ke coon ge anaa ayiihu lum Jeacuu. Nyoadh ngo kejea beehda loohng maa arob yihru ke coon, bang gihn beehda Ciig gih Juog naa arob yihru. ⁸ Abea keehd maano e gihn me nyaahn nud yi loohng gweeda yihru. Dhe yoohn kaa abeehd Jeacuu kedea dhe yoohn ka beehdu ge ne nyoadh ngo yihro kejea gihn me nyaahn nud yi loohng ni. Gihn me nyaahn nud yea bang gihn wu nyoge me giij reje ge adoohng e ge wiiu ke piny. Noono e nyoge giij beeye, ge anyoadh Juoge, ge niid gene niido yi kaa abeehd Jeacuu kii ngo kedea ka beehdu kii ngo.

⁹ Nea neehn gihn nu, kwaad ngaa rubo kejea e ngahy beehdo ke dhe yoohn nyaar Juoge abea wad gen maa ngad akuud yaa ayiiho maane maano, e ngaa nu poohd nyaar tiihy yi muudho kedea uwahdhe awaahn ni e giij nyepinye kwihye. ¹⁰ Beehda ngaa nyaar wad gen, maa ngad akuud yaa yiho, e naa ngaa beehdo ke dhe yoohn nyaar Juoge kedea gihn me ne ree me meehg ngo pahdh yihd giij adhemuohm tooro. ¹¹ Kwaad ngaa yug giij ajohr rih wad gen maa ngad akuud yaa ayiiho e naa ngaa me beed yi muudho me gihn me ngahye tooro. Ngo ngaa me tiihy giij me reje kedea ngo be tiihyo ke dhe yoohn daahd Juoge. Noono e gihn tiihye ngo kwihye bang gihn giij reje e tiihye ge naa acoore.

Wii Giij Reje Ge Tiijh Wiij Piny

¹² Wu nyethena loohnge giij ni
ge gweeda ke yihru bang gihn
Juog adhemuohme giijhu ge awiie piny yihru
ke nying gihn ayug Jeacuu Kriihjte yihru.

¹³ Wu jo ayiih lum Juog coon,
loohnge giij ge agweeda yihru
bang gihn wu adoohng ne nyoge me ngahy Jeacuu.
Jeacuu ge abeehdo e nud ke coon umodho
e piny poohd kuu acag.

Wu yaa nyaahn ge ayiih lum Juog,
loohnge giij ni ge agweeda yihru
bang gihn atiihb ukeehg ngo ataaju.

Wu nyethena loohnge giij ni
ge gweeda ke yihru bang gihn wu adoohng
ne nyoge me Juog Wuur ngahyu.

¹⁴ Wu jo ayiih lum Juog coon,
loohnge giij ni ge gweeda ke yihru,
bang gihn wu adoohng ne nyoge me ngahy Jeacuu.
Jeacuu ge abeehdo e nud ke coon
e piny poohd kuu acag.

Wu yaa nyaahn ge ayiih lum Juog,
loohnge giij ni ge gweeda ke yihru
bang gihn Jeacuu gaahnu gaahno keter
kedea Ciig Juog acubu yi cwihnyu
maa atiihb ukeehg ataaju.

¹⁵ Awaahn ni aroba yihru cang kejea giij reje ge nud wiij piny kan ge keá deehju yi cwihnyu bang gihn kwaad ngaa nyaar giij reje ge nud wiij piny kan, kare tooro unhyaare Juog Wuur thiow. ¹⁶ Giij reje wiij piny wa nyaar giij me kahl mihn cwihny yih dhaano e keede wa kwaad me neehn thama kedea nyaam ke nying giij ne yih dhaano; dhog yiehdh nu cang ge beehn kaa nying nyaar giij me reje ge nud wiij piny. Ge padh giij arob Juog Wuure kejea tiihyo gen.

¹⁷ Thiow Juog athubo ke raany giij reje ge nud wiij piny kedea yaa nyaar giij nu ge uthow. Abea ngaa tiihy gihn daahd Juoge, yihre unaa kuowo me guge tooro.

Koaru Rogu Ke Nying Yaa Mahn Giij Jeacuu

¹⁸ Nyethena, aroba yihru kejea rahny piny adoohng cahng. Ngahyu kejea anaa arob wane yihru kejea ngad mahn Jeacuu ngo ubeehn nea rahny piny adoohng cahng. Wa kaa arob wane ngo yihru, ngo aniidu ke nyingu awaahn ni, kejea jo mahn giij Jeacuu me thoohd ge atuohl. Gihn nu e ne nyoadh ngo yihru kejea cahng rahny piny ngo adoohng cahng. ¹⁹ Yaa mahn Jeacuu ge anaa bango kedea awaahn ni ge a'aay oogo bango. Ne cohg ge kuu anahg jo'o. Nea ge ne nahg jo'o maa yaa ayiiho, e ge be ne aay oogo bango. Abea waahdh gen nyoadh ngo kejea gahng ke dhaano acielo kiin gen maa anahg ngado.

²⁰ Abea wun, Jeacuu Wahy Juog acube yihru kedea giij beeye ge anyoadh Juoge ni, ge beehde e ge ngahyu cang.

²¹ Warga gihn agweeda yihru padh ke nying me kwihyu giij beeye ge anyoadh Juoge. Agweeda yihru bang gihn giij beeye ge nyoadh Juoge ge ngahyu ne cohg kedea bang gihn ngo ngahyu kejea giij beeye ge anyoadh Juoge puohny me raaj tooro yihd gen. ²² Abea aroba yihru kejea ngad toohd raaj ni beehda ngaa koohbo kejea Jeacuu ngo padh Ngad Boadh nyoge naa aohr Juoge wiij piny. Ngaa me rubo kea Jeacuu ngo padh Ngad Boadh nyoge, e beehda Juog Wuur kedea Jeacuu Waahd Juog ge naa akweere ke gen. Kedea gihn nu nyoadh ngo kejea ngaa nu e ne room keehd

ngaan ngahj e wihe ne mahn keehd Jeacuu. ²³ Gihn beehda lubo maa athiir bang gihn ngaa kweer ke Waahd Juog e ngo be rom nweehd keehd Juog Wuur. Abea ngaa yihi ngo nyum nyoge kea Jeacuu beehda Waahd Juog, e ngaa nu ngo anweehd naa acielo keehd Juog Wuur thiow.

²⁴ Nea wa gihn nu, e kea magu puohny gihn ngahyu coon ke nying Jeacuu beer mee. Nea puohny gihn nu amagu beer mee, e naa ka ubaru maalo e wu anweehd naa acielo keehd Waahd Juog kedea keehd Juog Wuur. ²⁵ Nea wo abeehdo e wo anweehd keehd Juog wa maano, e kuowo me guge tooro ngo yoado yoado. Kuowo gihn akob Jeacuu kea ngo ucube yihro.

²⁶ A toohn wun yi warga gihn kejea yaa nu a'aay oogo bango, ge daahd udwaahng gene wun keehd puohny gihi gen noono. ²⁷ Abea nea ke kur maru, e ngaa me romu ke dwaahngo tooro bang gihn Wahy Juog naa acub Jeacuu yihru wu konye konyo. Nea wa gihn nu, e wu padh nyoge me cahg daahd ke ngaa me puohny wun keehd gihi mooge me ne keede me padh gihi nyoadh Juoge yihru. Gihn ni ngo beehda Wahy Juog ge aohr Jeacuu yihru e ne puohny wun ne ngey athiir ke nying gihi nu cang. Thiow gihn puohny Wahy Juoge yihru yea tooro toohd. Nea wa maano e aroba yihru kejea beehdu e wu anweehd keehd Kriihjto wa kaa arob Wahy Juoge ngo yihru.

Beehdu Wa Nyethea Juog Kedea Wiiu Gihi Adhemuohm

²⁸ Noono nyethena, aroba yihru ubaru maalo ke beehdo e wu anweehd keehd Kriihjto. Beehdu e wu anweehd keehde beere e duue wihi piny kan ke yoohn Paar Maalo, e wo unghamo utoor laahy wihe rogo ne lore.

²⁹ Ngo ngahyo kejea Jeacuu beehda ngaa maa abiohgrwaal ke Juog. Nea wa gihn nu kea dhiilu ngo ke ngahyo kejea kwaad ngaa beehda abiohgrwaal ke Juog e ngaan nu beehda nyethiin Juog.

3 ¹ Juog Wuur wo anhyaare ne cohg! Wo anhyaare keter adhaahr ucuohne won ne nyethene. Adiehr muon, wo adoohng ne nyethen Juog. Abea keehd maano, e yaa nhyar gihi wihi ngoom ngo be yihi gene kejea wo nyethen Juog. Ngo be yihi gene bang gihn, Juog kwihy gene. ² Wu jo'a ge anhyaara, awaahn ni ngo ngahyo kejea wo beehda nyethea Juog. Abea ka udoohngo kii ngo, ngo poohd kuu anyoadh. Abea gihn ngahyo, cahng uduu Jeacuu wihi piny, e naa ka ungeyo ngo utoor gihn me cahgo ke kwihyo ke nyinge. Kaano e wo udoohng wa en. ³ Thiow kwaad ngaa me yihre ne gaahno kiinu kejea ngo uneehn Jeacuu Kriihjto ree kea meehge pahdh yaa adhemuohm. Ree kea meehge pahdh yaa adhemuohm wa mar Jeacuu e ree tooro adhemuohm.

⁴ Abea ngaa me koag ke yug gihi adhemuohm, ngo beehda ngaa maa akweer ke loohng Juog. Adiehr muon, ngad adhemuohm beehda ngaa maa apaahr oogo rih Juog. ⁵ Ngo beehda gihn me ngahyo kejea Jeacuu abeehn wihi piny kan beere ukim gih Juog ke nying adhemuohme gihi kahle ke oogo wudhu. Kedea ngo dhiilu kaa ngahyo kejea adhemuohm maa akuonge ke yugo ngo tooro. ⁶ Nea ne maano e ngaa maa anweehd tiehd keehd Jeacuu kea beehdo e yug gihi adhemuohm. Ngaa beehd e yug gihi adhemuohm, nyoadh ngo kejea gihn me rome ke deado ke nying Jeacuu tooro, kedea Jeacuu kwihye ne weey weey.

⁷ Nyethena, koaru rogu beer mee utoor ngaa me dwaahng wun. Ngaa abiohgrwaal ke Juog beehda ngaan tihi gihn akob Juoge kea tihiye wa mar Jeacuu ge abiohgrwaal ke Juog. ⁸ Abea ngaa koag ke yug gihi adhemuohm e ngo beehda ngad atiihb ukeehg, bang gihn atiihb ukeehg athubo ke yug adhemuohm maano e piny poohd kuu acag. Waahd Juog abeehn wihi piny kan ne raany gihi atiihy atiihb ukeehge utoor gih nying gene. ⁹ Ngaa maa adoohng ne nyethiin Juog ree be yuge ne dhaano me koag ke yug gihi adhemuohm bang gihn kihd Juog ke niido ree. Ree kea kuonge ke yugo ne ngaa me beehd e yug gihi adhemuohm bang gihn ngo beehda nyethiin Juog. ¹⁰ Gihn nyoadh nyethea Juog kedea gihn nyoadh nyethea atiihb ukeehg yihro ne cohg e man: kwaad ngaa be tihi gihn daahd Juoge e ngaan nu padh nyethiin Juog. Kedea ngaa kweer ke nhyar wad gen maa ngad akuud ngo padh nyethiin Juog thiow.

Tiihj Ke Loohng Juog Kedea Nhyar Rog

¹¹ Ciig Juog ge kob kejea nhyaro rogo nhyaro ngo alihng ke coon cahng ayiihu lum Jeacuu. ¹² Nea neehn maano, e rogo kea yugo wa Kaayn^a ngaa aweehg ree dwaahng yihr atiihb ukeehg naa amaane umen kedea unahge ngo. Umen anahge bang gihn gihi tihi Kaayne ge kuu abeero yi wong Juog, unahge gihi tihi umene ge naa apahdh yi cwihny Juog. ¹³ Jo paar mihi maa anhyaara, nea wa gihn nu e wu kea gaahy nea yaa wihi piny wu maan gene maano. ¹⁴ Abea won, ngo ngahyo kejea wo tooro yi cing atiihb ukeehg ge kahl thoo, bang gihn yihro ne kuowo me guge tooro. Ngo ngahyo kejea wo tooro yi cing atiihb ukeehg bang gihn yaa ayiho ge nhyaro nhyaro. Kwaad ngaa be nhyar wade maa ngad akuud, e ngaan nu poohd nii yi cing atiihb ukeehg ge kahl thoo. ¹⁵ Kwaad ngaa maan ngad gen uroom yi wong Juog ke ngaa me naahng nyoge. Ngahda beehde e ngo ngahyo kejea ngaa naahng nyoge padh ngaa me beehdo ke dhe yoohn kuowo gihn cub Juoge? E guge tooro.

¹⁶ Jeacuu Kriihjto ree agwaaye yi thoo ke nyingo, ne nyoadh ngo yihro ne cohg ka dhiilo nyoge ke nhyaro. Nea wa gihn nu e wo kea kweer ke gwaay rogo thiow ke nying joe ge yaa akuud. ¹⁷ Ngaa maa alony maa akweer ke kony ngad akuud maa angoohng, kare tooro ukobe ngo kejea yihre ne nhyaro gih Juog ge meehg dhaano nhyar ngaa moogo.

¹⁸ Nyethena, nea ne maano, e gihi med dhog ge kea yugo nea wo rubo kaa nying nhyar rogo. Gihi med dhog ge kea yugo abea dhiilo rogo ke konyo wa ka nhyar Juoge won. ¹⁹ Nea rogo anhyaaro ke dhe yoohn nu, e ngo unghyo ne cohg kejea wo beehda nyethea Juog. Juog ge e ne nyoadh gihn adiehr yihr nyoge. Thiow nea rogo nhyaro nhyaro e

^a3:12 Kaayn beehda waahd Adam ge beehda kuow nyoge cang. Kaayn anahg kaya, e yihre anaa umen maa abeehn ke batiene me nyinge Abel. Gihi tihi Kaayn ge kuu beero yi wong Juog. Cahng man e ge apiih ne cub gihi kweehr yihr Juog. Juog kaa ayug Abele kweehr yihre kii ngo, ngo anhyaar Juoge. Abea kaa ayug Kaayne gih kweehr kii ngo, ngo amaan Juoge. Gihn nu e Kaayn cwihnye araahnyo uwahdhe kaa anahge umen.

2:23 4:15; 5:1; Jon 5:23; 15:23; 2Jon 9 2:24 2:7 2:25 Jon 5:24 2:27 Jon 14:16; 16:13 2:28 3:21; 4:17; Jon 5:22; 15:5
 2:29 3:10 3:1 3:10; 4:6; Jon 1:12; 3:16 3:2 2Kor 3:18; Pihp 3:21 3:5 1:7; 2:2; 4:10; Jon 1:29; 8:46; 2Kor 5:21; Judea 4:15; 9:14; 1Pii
 1:19; 2:22, 24; 3:18 3:6 3:9; 5:18; Jon 15:5; Rom 6:2, 14 3:8 Mat 12:26-29; Jon 8:44 3:10 2:9, 29 3:11 2:7-8; 4:11; 13:34 3:13
 Jon 15:18 3:14 2:11; Jon 5:24; 13:35 3:15 Mat 5:21-22; Any 21:8 3:16 Jon 15:13; Gal 1:4; Pihp 2:17; 1Th 2:8 3:18 Jeam 2:15-17

aduuno naa yum ge kwahyo yihro Juog, ²⁰ keehd me rob aduule ngo yihro kejea wo yaa adhemuohm. Aduuno naa yum bang gihn giih ngahy Juoge ge akaal wudh giih rob aduule yihro. Juog, giih tiihyo cang ge ngahye.

²¹ Jo'a maa anhyaara, nea ngahy aduuno kejea wo be bar maalo ke yug adhemuohm, e gihn me tudo ke nyinge tooro ge kwahyo yihro Juog. ²² Kede a ge toor adhemuohme me baro maalo ke yuge, e Juog gihn kwayo yihre ngo ucube yihro. Ngo ucube yihro bang gihn wo tiihyo kaa gihn arobe kede a bang gihn wo beehdo kaa dhe yooh me nhyaar Juoge.

²³ Loohnge giih arob Juoge kejea tiihyo ke gen, ge aman: Dhiilo ngo ke yiho kejea Jeacuu Kriihjto ngo Waahd Juog kede a dhiilo rogo ke nhyaar wa kaa arob Jeacuu ngo yihro. ²⁴ Kwaad ngaa tiihy gihn arob Juoge, e ngaan nu ngo anweehd keehd Juog kede a Juog beehda anweehd keehde thiow. Gihn nyoadh ngo yihro kejea Juog beehda anweehd keehd won, beehda gihn abeehn Juoge ucube Wahy Juog yihro ne beehd ke won.

Koaru Rogu Ke nying Yaa Mahn Giih Jeacuu

4 ¹ Jo'a maa anhyaara, paajo yea apahng ke yaa ucahb ge koohbo kejea ge yaa agamloohngjuog. Ke nying yaa nu, e naa gihn roba ngo yihro ubahng lum ngaa me koohbo kejea yihre ne Wahy Juog be yiho. Abea kuongu yihdh giih robe ke deado beer mee ne ngahy giih ngo ne cohng nea yihre ne Wahy Juog. ² Beehda ke dhog yiehdh ni e nuu unghy ngaa yihre ne Wahy Juog. Ngaa koohbo kejea Jeacuu Kriihjto abeehno wa dhaano utaahngo, e ngaan nu puohnye aay ke bang Wahy Juog. ³ Abea ngaa kweer ke yihi adiehj nu, e ngaan nu Wahy Juog tooro ree, kede a beehda ngad mahn gih Jeacuu. Ngad mahn Jeacuu ge bange aliingu kejea ngo ubeehn, awaahn ni ngo abeehno maa ngo nud wihi piny.

⁴ Abea wun ge nyethena maa anhyaara, wu beehda nyethea Juog. Kede a wu akweer keehd giih toohd ge puohny yaa ucahbe. Wu akweer ke puohny yaa ucahb bang gihn Wahy Juog ge ne rogu, teege duohng keter ukaale wihi tee mar atiihb ukeehg ge e naa ruohdh yaa wihi piny giih kwihy Juog. ⁵ Yaa ucahb ge padh yaa Juog. Noono e ge rubo kaa nying giih wihi piny ge be nhyaar Juoge. E naa gihn beehn yaa wihi piny ge kwihy Juog unhyaar gene lihng giih puohny yaa ucahbe kede a uyih gene gen. ⁶ Abea wa jo oohr, wa beehda yaa Juog. Noono e kwaad ngaa ngahy Juog, puohny wan lihng lihng. Abea kwaad ngaa kuu ayih lum Juog, puohny wan be yihi. Nea maano e naa ka unghy ngaa yihre ne Wahy Juog kede a ngaa beehda ngad ucahb e yihre tooro Wahy Juog. Ngaa yihre ne Wahy Juog puohny wan yihi yiho. Abea ngad ucahb, e yihre tooro Wahy Juog, puohny wan be yihi.

Rob Ke Nying Nhyaahro

⁷ Jo'a maa anhyaara, dhiilo beehdo e rogo nhyaar nhyaro. Gihn ni aroba yihro bang gihn beehda Juog e ne meehg won nhyaar nyoge. Kwaad ngaa nhyaar nyoge kiinu, e ngaa nu beehda nyethiin Juog kede a Juog ngahye. ⁸ Ngaa be nhyaar nyoge, e ngaan nu Juog kwihye ne weey weey. Gihn ni ngahyo bang gihn Juog gihre beehda nhyaar nyoge.

⁹ Dhe yoohn anyoadh Juoge ngo yihro ne cohng kejea nyoge nhyare nhyaro beehda gihn aohre Waahde ge acielo cog ne beehn wihi piny. Ngo aohre beere kuowo me ne cohng yoado yoado ke nying Waahde. ¹⁰ Padh gihn nhyaro Juog e naa meehn nhyaro gihn ne kiino ke Juog. Meehn nhyahro beehda gihn anhyaar Juoge won ke dhe yoohn aohre Waahde ne thoo beere adhemuohme giho ge wiie ke piny yihro. ¹¹ Jo'a maa anhyaara, me neehn maano anhyaar Juoge won keter, kea noono nhyaro rogo ke karo cang. ¹² Dhaano utaahngo maa akuong Juog ke niido tooro. Abea keehd maano toor ngaa maa aniid Juog, nea rogo nhyaro nhyaro e wo beehda anweehd ke Juog. Kaano e Juog nyoge nhyare nhyaro ke nyingo ke kar cwihnye me daahde.

¹³ Ngahyo kejea wo anweehd ke Juog kede a Juog anweehd ke won kaa nying gihn abeehne ucube Wahy Juog yihro. ¹⁴ Wa jo oohr, ngo beehda athiir maa aniid wane kede a uteed wane ngo yihro nyoge kejea Juog Wuur Waahde aohre wihi piny ne boadh nyoge. ¹⁵ Kwaad ngaa yihi ngo kejea Jeacuu beehda Waahd Juog e ngaan nu ngo anweehd ke Juog kede a Juog anweehd keehde. ¹⁶ Ngo beehda gihn me ngahyo kejea Juog wo anhyare ke raahyo kede a Juog gaahno gaahno kejea ngo ubar maalo ke nhyaar won.

Juog gaahno gaahno bang gihn Juog gihre beehda nhyaar nyoge. Kwaad ngaa nhyaar Juog kede a nyoge mooge, e ngaan nu anweehd ke Juog kede a Juog anweehd keehde thiow. ¹⁷ Juog nyoge anhyare ke nyingo wa ka daahde ke cwihnye, e naa gihn bahng wo be tud cahng lug Juog. Wo be tud cahng lug Juog bang gihn wo ubeehdo naa anweehd keehde tiehd wihi piny wa mar Jeacuu naa abeehdo naa anweehd keehde wihi piny. ¹⁸ Kwaad ngaa me ngahy ngo kejea e anhyaar Juoge, e ngaan nu be tud yihro Juog. Noono nea nyoge nhyaar Juoge nhyaro ke nyingo wa ka daahde ke cwihnye, e wo be tud yihro Juog ne lihng lihng. Nea nyoge ge tud yihro Juog e beehda ke nying gihn ngahy gene ngo kejea ge ukim Juoge. Noono nea dhaano utudo yihro Juog, e nyoadh ngo kejea Juog be meehge nhyaar nyoge ke nyinge wa ka daahd Juoge ke cwihnye.

¹⁹ Gihn cub tee yihro ne nhyaar Juog kede a ne nhyaar nyoge mooge, beehda bang gihn Juog wo anhyare ke coon maano e ngo poohd koa nhyaro. ²⁰ Ngaa koohbo kejea Juog anhyare abea wad gen maa ngad akuud be nhyare, e ngaan nu beehda ngad toohd. Ngo beehda ngad toohd bang gihn kare tooro unhyare Juog ge be neehn yihre unahge ke wad gen ge kwaaye ke niido e ne be nhyare. ²¹ Thiow dhiilo yao ge yaa akuud yaa ayiho ke nhyaro bang gihn e naa gihn arob Juoge kejea yugo ngo. Akobe kejea kwaad ngaa nhyaar en, kea dhiile wad gen maa ngad akuud ke nhyaro thiow.

Rob Ke Nying Yiho

5 ¹ Kwaad ngaa ayih ngo kejea Jeacuu beehda Ngad Boadh nyoge gihn aohr Juoge wihi piny, e ngaan nu beehda nyethiin Juog. Kede a ngaa nhyaar wur nyethiin e beehde nyethiin nhyare nhyaro thiow. ² E naa ka ngahyo ngo ne cohng kejea nyethea Juog ge nhyaro nhyaro nea Juog anhyaro ke dhe yoohn yug giih arobe yihro. ³ Ka nhyaro

3:21 2:28 **3:22** Jon 15:16 **3:23** Jon 2:23; 13:34 **3:24** 4:13; Jon 14:16; 15:5; Rom 8:5, 9, 14 **4:1** 2:18; Mat 7:15; 1Th 5:21 **4:2** Jon 1:14; Rom 10:9; 1Kor 12:3 **4:3** 2:18, 22 **4:4** 5:5 **4:5** Jon 3:31 **4:6** 2:4; 3:1; Jon 8:47; 18:37 **4:8** 4:16 **4:9-10** Jon 3:16 **4:10** 2:2; 3:5; Rom 5:8, 10 **4:11** 3:11; 4:21; Mat 5:44-45; 18:33; Jon 13:34; 2Jon 5 **4:12** 2:5; 4:17; Jon 1:18 **4:13** 3:24 **4:14** Jon 15:27
4:15 2:23 **4:16** 4:8-10; Jon 15:5 **4:17** 2:28; 4:12 **4:20** 2:9 **4:21** 4:11; Mat 22:34-40 **5:1** 1Pii 1:22-23 **5:3** 2:5; Mat 11:30

Juog kii ngo beehda ne tihiy giij arobe kejea yugo gen. Giij arob Juoge kejea dhiil gen ke yugo, ge padh giij me teeg ke yugo. ⁴ Ge be teeg bang giijh ngaa nyethiin Juog yihre ne tee me meehg Juoge en kweer ke tihiy giij reje ge tihiy dhaano utaahnge. Yihro ne tee me meehge won kweer ke yug giij reje bang giijh wo beehda nyoge maa ayiij lum Jeacuu. ⁵ Ngaa moogo me nud tooro me yihre ne tee me meehg ngo kweer ke yug giij reje nea padh ngaa maa ayiij ngo kejea Jeacuu beehda Waahd Juog.

⁶ Beehda Jeacuu Kriihjto e naa ngaa abeehno ke yoohn Paar Maalo wiijh piny kedea beehda en e ne wiije anaa amuoj Joone ke piij luogwahy, kedea anahg en e ne reme anaa awuoj piny naa anaa anahge. Padh giijh amuoje ke piij luogwahy e naa adiehj ngahyo cog ke nyinge, bang giijh thone uwuoj reme piny beehda adiehr moogo thioiw me ngahyo ke nyinge. Wahy Juog, ge nyoadh giijh maa adiehr, e naa anyoadh ngo yihro kejea giijh nu ge beehda giijh maa adiehr.

⁷ Nud ke nyepinye adahg me meehg won ngey giijh maa adiehr ke nying Jeacuu. ⁸ Acielo beehda dhe yoohn rub Wahy Juoge ke won. Riown gen beehda dhe yoohn kaa amuoj Jeacuu ke piij luogwahy. Kedea dahg gen beehda dhe yoohn kaa anahge uwuoj reme piny. Dhog yihdh ni adahg ge nyoadh nyepiny acielo, kejea Jeacuu beehda Waahd Juog. ⁹ Nea dhaano ubeehno urube yihro ke nying giijh me ngahye, ngahda lume yiijho yiijho ne? Nea maano e giijh anyoadh Juoge yihro ge dhiilo kaa yiijho. Ge dhiilo kaa ayiijho bang giijh, giijh teed Juoge yihro kejea ngo adiehr, e ne wiije ne maalo rih mar dhaano utaahngo. Wiije ne maalo bang giijh beehda Juog ke ngude e naa arob ngo, kedea Juog arubo kaa nying Waahde. ¹⁰ Nea neehn maano, e kwaad ngaa yiijh ngo kejea Jeacuu beehda Waahd Juog, e ngo ngahy ngaan nu ne cohg kejea giijh anyoadh Juoge ge beehda giijh maa adiehr me cwihny be daag rog gen. Abea kwaad ngaa be yiijh giijh arob Juoge, e ngaan nu Juog akoohbe toohd. Juog akoohbe toohd bang giijh akweer ke yiijh giijh arob Juoge ke nying Waahd Juog. ¹¹ Cwihnyo be diiw ke nying giijh maa arob Juoge bang giijh kuowo me ne cohg acube yihro. Kuowo me yoad ke bang Waahd Juog. ¹² Noono arumo e ngaa anweehd ke Waahd Juog kuowo giijh nu ayoad. Abea ngaa kuu anweehd ke Waahd Juog, kuowo giijh nu tooro yihre.

Kuowo Me Ne Cohg

¹³ Giijh ni ge agweeda ke yihru wu jo yiijho kejea Jeacuu beehda Waahd Juog. Ge agweeda yihru beere cwihnyu be diiw ke nying kuowo me ne cohg ge ne yihru.

¹⁴ Nea maano yihro tooro lwahr nyum Juog bang giijh Juog gaahno gaahno kejea kwaad giijh kwayo yihre, e ngo ucube yihro. Ngo ucube yihro nea giijh kwayo e naa giijh daahde kejea kwahyo ke nyinge. ¹⁵ Ngahyo kejea Juog kuu akuong kweer nea wo kway giijh daahde kejea kwahyo ke nyinge, e naa giijh ngahyo ngo kejea giijh apeehnyo ngo ucube yihro.

¹⁶ Noono nea ngahy ngaa me ne kiinu kejea nud ke ngad akuud yaa ayiijho me yug adhemuohm, kedea adhemuohm ngo padh adhemuohm me paahng kiin gen ke Juog ne weey weey, e kea dhiile Juog ke kwayo ke nying ngaan nu, kedea Juog kuowo me ne cohg ucube yihro ngaan nu. A rubo yihru kaa nying nyoge maa adhemuohme giijh gen padh kwaad adhemuohme giijh paahng kiin gen kehd Juog ne weey weey. Abea nud kaa adhemuohme me paahng kiin nyoge kehd Juog ne weey weey. Kwaad yaa yug adhemuohm nu, a be rubo kejea dhiil dhaane kwaj yihro Juog ke nying gen. ¹⁷ Kwaad giijh anyoohne me yug dhaane ge reje yihro Juog. Abea nud kehd adhemuohme me thoohd me be paahng kiin nyoge kehd Juog.

Gooy Wudh Luube Piny

¹⁸ Ngo ngahyo kejea ngaa nyethiin Juog, giijh adhemuohm ge be kwaaye ke yugo bang giijh ngo kony Waahd Juoge konyo beere giijh me raaj me yug atiihb ukeehge ree tooro. ¹⁹ Ngo ngahyo kejea wo beehda nyethea Juog kedea ngo ngahyo thioiw kejea atiihb ukeehg e naa ruohdh yaa beed wiijh piny ge kuu ayiij lum Juog. ²⁰ Ngo ngahyo thioiw kejea Waahd Juog abeehn wiijh piny kan kedea umeehge won ngahy Juog Aciehg ge rob giijh maa adiehr. Wo beehda anweehd kehd Juog Aciehg ge rob giijh maa adiehr bang giijh wo beehda anweehd kehd Waahde Jeacuu Kriihjto. E noono, e naa Juog Aciehg, Juog moogo tooro, kedea e ne cub kuowo me ne cohg.

²¹ Wu nyethena maa anhyaara, koaru rogu ubahnge wudhu be cubu rog giijh yiehdhe.